

ՆԵՐՍԵՍ ԼԱՄԲՐՈՆԱՅՈՒ ՓԻԼԻՍՈՓԱՅԱԿԱՆ ՀԱՅԱՑՔՆԵՐԸ

Գ. Հ. ԳՐԻԳՈՐՅԱՆ

Ներսես Լամբրոնացին (1153—1198) Կիլիկիայի հայկական պետության այն նշանավոր մտավորականն ու գործիչն է, որի անձի ու գործի շուրջը հասարակական կարծիքներ են արտահայտվել դեռևս նրա կենդանության ժամանակ: Դրա պատճառը այն է, որ նա խորապես հետաքրքրվել է ժամանակի հասարակական-քաղաքական իրադարձություններով և ակտիվորեն մասնակցել դրանց՝ պարզորոշ դրսևորելով իր դիրքորոշումը և եռանդուն պայքարել իր համոզմունքներն իրականացված տեսնելու համար: Իր կարճ կյանքի ընթացքում նա դրել է մոտ 35 անուն աշխատություն¹, որոնցում շոշափել է նաև տեսական-փիլիսոփայական հարցեր: Սույն հոդվածը առաջին փորձն է իր բնորոշ գծերի մեջ ներկայացնելու Լամբրոնացու փիլիսոփայական ըմբռնումները:

Մարդկանց փոխհարաբերությունների ու բարոյական բնութագրի, ինչպես նաև հասարակական-պետական հարցերին անդրադառնալիս Լամբրոնացու համար ելակետ է ծառայել մարդու կամքի ազատության մասին ուսմունքը:

Միջնադարյան մտավորականը բավականին հետևողականորեն պաշտպանել ու զարգացրել է այն տեսակետը, թե մարդիկ ու ժողովուրդներն են տնօրինում իրենց կյանքը և ճակատագրական չէ նրանց ուղին: Մարդկանց գործողությունները կանխորոշված չեն որևէ մեկի կողմից և նրանք իրենք են պատասխանատու իրենց արարքների համար: Եթե մարդու կամքն ազատ չլինի և նրա արարքները կանխորոշված լինեին, ապա մարդը պատասխանատու չէր լինի իր արարքների համար և նրան հնարավոր չէր լինի դաստիարակել: Եթե ընդունենք, որ կամքը ազատ չէ և մարդու ճակատագիրը կանխորոշված ու նախասահմանված է, ապա դրանից կհետևի, դատում էր հայ մտավորականը, որ չպետք է հակառակվել չարին, որտեղից էլ այն բխի: Լամբրոնացին կտրականապես դեմ է այն տեսակետին, ըստ որի եթե ազգը նվաճել ու կեղեքում են, ապա պետք է համբերել, քանի որ դա նախասահմանված է տիրոջ կողմից, և զուր կլինի դրա դեմ պայքարելը: Նա պնդում է. «Զի ամենայն ինչ մեր ի շարն որոշի և ի բարին ոչ ըստ բնութեան, այլ ըստ անձնիշխան կամաց, քանզի որ բարի է՝ կարող է չար փոփոխել և որ չար՝ կարող է բարի»²: Ընս եմ առիթ իմոյ կործանման և ոչ բարկութիւնն աստուծոյ, զի ես տամ զանձն գիտութեամբ ուղղութեանն ի թիւր ճանապարհն և մեղանշեմ»³:

Այսպիսով, նա կամքի ազատության տեսության կողմնակից էր: Մարդն ազատ է իր գործողությունների ընտրության մեջ. նա իր կամքի թելադրանքով կարող է և՛ բարիք, և՛ չարիք գործել: Նա բանական էակ է և նախքան գործելը

¹ Ն ե Ր Ս Ե Ս Ա կ ի ն յ ա ն, Ներսես Լամբրոնացի, մաս Բ, Վիեննա, 1956:

² Զեռ. № 4694, էջ 197ա: 'ՀՄՄՀ Միևիստրների սովետին առընթեր Մաշտոցի անվան հին ձեռագրերի ինստիտուտ (Մատենադարան): Սույն հավաքածուից օգտվելիս այսուհետև նշելու ենք միայն ձեռ.:

³ Նույն տեղում, էջ 385բ:

խորհում ու կշռադատում է և դրանով էլ տարբերվում է կենդանիներից: Լամբրոնացու կարծիքով՝ մարդուն այս կամ այն գործողությունը կատարել տալու համար նախ պետք է նրա «ներքին կամքը» նախապատրաստել դրան: Իհարկե, Լամբրոնացին հասկանում էր, որ մարդը միշտ չի կատարում իր կամքի թելադրած գործողությունները: Դրա համար էլ նա ներքին կամքը տարբերում է արտաքինից: «Մարդս անձնիշխան է և ներքինս ունի կամս և արտաքին,— գրում է նա:— Արտաքին կամացս և մարմնոյս կարեն իշխել բազումք, բռնութեամբ ծառայեցուցանել և աշխատել: Իսկ ներքնոյն ոչ բնաւ՝ ոչ աստուած և ոչ սարդ, զի անձնիշխան է, այլ ծառայեցուցանէ զնա միայն սերն»⁴: Դժվար չէ հասկանալ, որ Լամբրոնացին «ներքին կամք» ասելով հասկանում է մարդու համոզմունքն ու ցանկությունը, իսկ «արտաքինի» տակ՝ սոսկ նրա գործողությունները, որոնք կարող են միմյանց չհամապատասխանել: Այս ըմբռնման մեջ արտացոլվել է ժամանակի հասարակական հարաբերությունների պրակտիկան, որը հիմնված էր հարկադրանքի ու բռնության վրա:

Սակայն Լամբրոնացին, չխիզախելով առաջ գնալ, կամքի ազատության վերաբերյալ իր մտքերն աշխատում է հաշտեցնել աստվածաբանական սկզբբունքների հետ: Մարդու կամքը չնայած «անձնիշխան է», ասում է Լամբրոնացին, բայց և այնպես աստված ամենագետ է, նրա գիտությամբ է տեղի ունենում ամեն ինչ:

Չնայած սահմանափակությանը, կամքի ազատության մասին Լամբրոնացու ուսմունքը պետք է դրական գնահատել, քանի որ այն ելակետային նշանակություն ունի սոցիալ-քաղաքական երևույթներ մեկնաբանելիս:

Լամբրոնացին գերազնահատում էր պատմության մեջ անհատի դերը: Պետական-հասարակական գործերի հաջող ընթացքն ու ելքը, ըստ նրա, մեծ չափով կախված է այդ գործերի ղեկավարից, ուստի՝ նա չպետք է ապավինի միայն իր ուժերին ու կարողություններին: Իմաստուն առաջնորդի առաքինությունները մեկն էլ նրա համեստությունն է, որը պետք է դրսևորվի պետական գործերը տնօրինելիս խորհրդակցիների ձայնին ունկնդրելու, նրանց կարծիքը հաշվի առնելու մեջ: Կառավարման միապետական ձևի դեմ չըմբոստանալով հանդերձ՝ Լամբրոնացին գտնում էր, որ պետական-հասարակական հարցերը չպետք է միանձնյա լուծում ստանան, այլ վճռվեն քննադրումից հետո: «Որք իմաստուն առաջնորդք են՝ ստանան խորհրդակցիցս և նոքօք զբանն վճռեն,— գրում է նա,— որպէս արարին հռոմանցիքն և տիեզերակալեցին»⁵: Լամբրոնացին ամենայն հավանականությամբ նկատի ունի Հռոմեական պետության ոչ միայն հանրապետական, այլև դրանից հետո ընկած այն ժամանակաշրջանը, երբ կայսրին կից դեռևս գոյություն ունեւր խորհրդակցական օրգան՝ սենատ: Ինչպես տեսնում ենք, հռոմեական հզոր կայսրության գոյատևման պատճառներից մեկը նա համարում է պետական իշխանության հաջող կազմակերպումը: Վկայակոչելով Մակաբայեցիների ժամանակաշրջանի հրեաների պատմությունը (մ. թ. ա. II դ.), Լամբրոնացին հիացմունքով է հիշատակում, որ «50 այր ամենայն աւուր ի խորհուրդ նստէին և համաձայնութեամբ զիշխանութիւնն վարէին»⁶: Պետական նշանակություն ունեցող հարցերի միանձ-

⁴ Նույն տեղում, էջ 20ա (ընդգծումներն ամենուրեք մերն են—Գ. Գ.):

⁵ Ձեռ. № 1142, էջ 71ա:

⁶ Նույն տեղում, էջ 71բ:

նյա լուծումը չի կարող կատարյալ լինել, որովհետև անհատը, որքան էլ տաղանդավոր լինի, չի կարող անսխալական լինել: Իսկ առաջնորդի սխալը միշտ խորը հետևանքներ է ունենում, ընդգրկում է կյանքի ավելի մեծ ոլորտ և երբեմն հնարավոր չի լինում ուղղել: «Առաջնորդ, եթե հոգևոր և եթե մարմնաւոր, որ ինքնիշխանութեամբ կատարէ զգործն՝ փրկութիւն ոչ կարէ ուղղել ընդ ձեռամբ անկեղծցն»⁷, — գրում է Լամբրոնացին: «Երկրագործին սխալանք անձին միայն վնասէ, իսկ թագաւորին ամենայն աշխարհին»⁸: Ահա այն սկզբունքը, որն, ըստ Լամբրոնացու, պետք է հաշվի առնի յուրաքանչյուր պետական-հասարակական գործիչ:

Լամբրոնացին արդար է համարում ժողովրդի զայրույթն այն թագավորների ու իշխանների նկատմամբ, որոնք քաղաքների ու գավառների ղեկավար են նշանակում շար, ազա՛հ ու ապաշնորհ մարդկանց: «Արդարև անիծանեն ժողովք զթագավոր կամ զիշխան, — ասում է Լամբրոնացին, — որք անբարիշտ ու անիրաւ մարդոյն համարձակութիւն տան ի վերայ քաղաքաց և գաւառաց՝ զզուլ զաշքատս և շարշարել ի տարադէպ իրս զմարդիկ, զայս անբարըշտի տոտղն անիծանեն և յտեն ազգ, որոց իշխէ նա»⁹:

Այստեղ դրսևորվում է նաև Լամբրոնացու ժողովրդասիրութիւնը, որին մտահոգել ու վիշտ են պատճառել սոցիալական կյանքի անարդարութիւնները, ժողովրդական մասսաների անմխիթար վիճակը և ունեւորների անպատիժ արարքները: Լամբրոնացին դաժան ու ազա՛հ թագավորներին և իշխաններին նմանեցնում է առյուծի ու գայլի հետ, առյուծի՝ «զի այս գազանս զօրաւոր է և կարող ի վերայ այլոց գազանաց» և գայլի՝ «վասն յափշտակասեբ մտացն, զի ունելով զկարութիւնն ըստ իշխանութեան և զազահութիւն՝ յափշտակութեամբն բռնադատէ զաղքատս, տուգանէ զմեծատունս, ծանրացուցանէ զհարկսն, ստրկացուցանէ զգավառն և զամենեանս անհանգիստ պահէ ընդ իշխանութեամբ՝ բռնադատելով արտաքո իրավանց»¹⁰:

Լամբրոնացին ոչ միայն արձանագրել է սոցիալական անհավասարութեան փաստը, այլև գիտակցել դրա պատճառը: Նա գրում է. «Ճշմարիտ այսպէս է, զի տնանգն թափուր գոլով յընչից, որով ահարկու երեկն, ողորջանօք բարբառի, իսկ մեծատունն ընչիւքն և սպասաւորօքն յղփացեալ յանդգնութեամբ զոր ինչ ախորժէ՝ ասէ»¹¹: Նա գիտակցում էր, որ «իւնչքն» է այն գործոնը, որը մարդուն իր ժամանակի հասարակութեան մեջ ուժ է տալիս և հանդուգն դարձնում: «Ընչից» զուրկ անձնավորութիւնը «ողորջանօք բարբառի»:

Ապրելու համար մարդուն անհրաժեշտ են կենսամիջոցներ՝ սնունդ, հագուստ, բնակարան, ասում է Լամբրոնացին: Մարդիկ աշխատում են հայթայթել դրանք, բայց քանի որ մարդու կարիքները կարող են աճել, իսկ կենսամիջոցներն էլ սահմանափակ են, ապա դրա պատճառով յուրաքանչյուրը ձգտում է ապահովել իրեն նյութական մեծ միջոցներով: Կենսամիջոցներ հայթայթելու ժամանակ մարդիկ հաճախ խտրութիւն չեն դնում դրանց հասնելու եղանակների մեջ, սպանում են միմյանց, հարստահարում, զանազան զրկանք-

⁷ Նույն տեղում:

⁸ «Սրբոյն Ն. Լամբրոնացու Տարսնի եպիսկոպոսի կորհրդածութիւնք ի կարգս եկեղեցւոյ», Վենետիկ, 1847, էջ 53:

⁹ Զեռ. Ձ 1142, էջ 153ա:

¹⁰ Նույն տեղում, էջ 187բ:

¹¹ Նույն տեղում, էջ 116բ:

ներ պատճառում: Ահա այս հետաքրքրական միտքը միջնադարյան մտավորականի շարադասութեամբ: «Արար զմեզ աստուած յայս կեանս հարկաւորացն կարօտ, այսինքն՝ կերակրուց, սղեստուց, յարկաց, և ի սոցա պէտսն զբառեալ զտաք յանշափութիւն, և վասն յանշափութեանն միմեանց ի հարստահարութիւն, և անտի ի նախանձ և թշնամութիւն, ուստի ծնանի սպանութիւն և զրկանք և ամենայն անկարգութիւն»¹²:

Լամբրոնացին, սակայն, չի մտածում, թե մարդկանց միջև պայքարը հետապնդում է սոսկ բավարար չափով կենսամիջոցներ ձեռք բերելու նպատակ և մզվում է միայն դրա համար: Անշուշտ, նյութական պահանջմունքների բավարարումն առաջնային է, որովհետև դրանից է կախված մարդու ֆիզիկական գոյութիւնը: Բայց, ըստ նրա, պակաս դեր չի խաղում նաև մարդկանց նախանձը միմյանց նկատմամբ, որը ունեցվածքը բազմապատկելու և դրանով հասարակութեան մեջ անհատի դիրքն ու տեղը երեւելի դարձնելու նպատակ է հետապնդում: Նախանձն, ուրեմն, ոչ թե սոսկ մարդու էությունից բխող բարոյական հատկանիշ է, այլ նախ և առաջ հետևանք է հասարակական հարաբերութիւնների ու պայմանավորված է դրանցով: Լամբրոնացին դրում է. «Ոչ է այնքան ըստ պիտոյից, որչափ առաւելապէս ըստ նախանձու, զի նախանձով մարդիկ առ իրեարս յաճախէն ի շինւածս, ժողովէն ստացւածս, շինեն և տնգեն: Զի թէ չէր նախանձ մերձաւորին, բաւական էր թագաւորին իւր քաղաքն և աշխարհն: Սակայն նախանձի ընդ համանունն՝ և փութա զնորին յափշտակել, և այսր կռիւք և արեանց հեղմտնք: Այսպէս նախանձն թռնադատէ զերկրագործն մերձեցուցանել զանդաստանն առ անդաստանն և զընկերին հանել, և ոչ բնական կարիքն... Արդ տեսանէ սա միանգամայն, զի ամենայն շանի, և վաստակս, և զրկանաց, և անիրաւութեանց առաւել նախանձն է պատճառ, քան բնական պէտքն»¹³: Ուշագրավ է նաև այս մտքի շարունակութիւնը. «Եւ նախանձս այսպէս ունի զընթացսն՝ առ մերձաւորն և ոչ առ հեռաւորն, զի ոչ նախանձի քաղաքացի ընդ զինւոր, և ոչ զինւոր ընդ երկրագործ, ալ իւրաքանչիւր ոք ընդ իւր գործակիցն՝ թագաւորն ընդ թագաւորն, իշխանն ընդ իշխանն, աղքատն ընդ աղքատն»¹⁴: Այս դատողութիւնը պարզապէս արտացոլումն է Լամբրոնացու ժամանակի իրավահարաբերութիւնների, որոնք հիմնոված էին դասային աստիճանավորման վրա և բացառում էին ֆեոդալական հիերարխիայի առավել բարձր աստիճանի վրա աշխատավոր մարդու քարծրանալու հնարավորութիւնը: Այս պատճառով էլ կարողութեան ու դիրքի հասնելու ձգտումը կարող էր դրսևորվել ու արտահայտվել միայն միևնույն դասի մարդկանց շրջանակներում:

Այսպիսով, Լամբրոնացու մտքերից հետևում է, որ նյութական պահանջմունքների բավարարման կենսաքանակաւ գործոնին գումարվում է նաև հասարակական հարաբերութիւններից բխող հանգամանքը՝ նախանձը, որ մարդկանց մղում է թի զրկելն զմիմեանս, ի սպանանել, ի հաճոել, ի բամբասել»¹⁵:

Լամբրոնացին գտնում է, որ սեփականութեան համար մղվող պայքարը դաժան է ու անմարդկային. «անկարգութիւն և հարստահարութիւն մարդկան ի

¹² Նույն տեղում, էջ 205բ:

¹³ Նույն տեղում, էջ 225բ:

¹⁴ Նույն տեղում:

¹⁵ Նույն տեղում, էջ 226ա:

միմեանց և կամ տիրապէս ասել՝ ի դիւաց, և ոչ ոք է, որ մխիթարէ... Ի վերա
յառնէն միմեանց և գազանահին անմտութեամբ զրպարտեն զիրեարս: Յայս է
ամենայն ընթացք մարդկան»¹⁶, «Մեծատուն՝ Բնէն զաղֆատուն... այլք յա-
րէն տուն առ տուն և անդաստան առ անդաստան և զընկերին հանեն...: Լան,
հառաչէն, ողբան, առ աստուած բողոքէն, առ մարդիկ աղաղակէն և մնան
բազումք ի նոցանէ անմխիթարք: Եւ որ երեկ ընչից տէր, այսօր կողոպտեալ և
հացի քաղեալ, որ երեկ կենդանի, այսօր խոցոտեալ յաւազակաց՝ կիսամեռ,
որ երեկ սրբութեամբ պատեալ, այսօր զրպարտեալ բանիւ և ընդ շարագործս
արտաքսեալ, և ոչ ունի մխիթարութիւն առ ձեռն, զի քրիստոնէից մխիթարու-
թիւնս սակաւաց է, և այս անագան ուրեմն»¹⁷:

Կյանքի արատներն ու անարդարութիւնները մերկացնող այս հատված-
ներում բացահայտված են հասարակական կյանքի հետևյալ երկու հիմնական
մոմենտները. նախ, հասարակության սոցիալական շերտավորումը, ընդ որում՝
ունևորներն անպատիժ հարստահարում ու կեղեքում են աղքատներին ու նրանց
թշվառության դուռը հասցնում, և երկրորդ, ցույց է տրվում, որ չկա մի ուժ
կամ զորութիւն, որ օգնության ձեռք մեկնի կեղեքվողներին ու հարստահար-
վողներին, լսի նրանց բողոքը և ամոքի նրանց վիշտը:

Բուն փիլիսոփայական-իմացաբանական խնդիրներ կամբրոնացու աշխա-
տութիւններում համեմատաբար քիչ են արծարծվում, և այս հանգամանքը
սահմանափակում է նրա փիլիսոփայական-ընագիտական գիտելիքները բազ-
մակողմանիորեն արտացոլելու հնարավորութիւնը, թեև կասկածից վեր է,
որ այդ բնագավառում էլ կամբրոնացին պետք է ունեցած լինի հայացքների
ամբողջական համակարգ:

Ինչպես միջնադարյան մտածողների գերակշռող մեծամասնութիւնը, այն-
պես էլ կամբրոնացին փիլիսոփայության հիմնական հարցը լուծել է կրոնա-
իդեալիստական ոգով: Նրա ըմբռնմամբ՝ առաջնայինն ու սուրստանցիոնալը
աստված է: Նրանից է սկսվում ամեն ինչ ու նրանով է պայմանավորված ողջ
գոյը: Աստված հավերժ է, մշտական, աներևոյթ, անքննելի, անճա-
նաչելի և այլն: «Աստծոյ աներևոյթ բնութիւնն արարածութիւնս իմանի»¹⁸,—
գրում է կամբրոնացին: Նա աստծո գոյութեան կոսմոլոգիական ապացուցման
դիրքերում էր կանգնած: Բնութեան մեջ «կարգ» կա, յուրաքանչյուր առարկա և
երևոյթ իր նշանակութիւնն ու դերը՝ «պաշտօնն» ունի: Այս վկայում է, որ
եղել է ու կա նրա արարիչը: Բնութեան երևոյթների ներդաշնակութիւնն ու
նպատակահարմարութիւնը աստծո ստեղծագործական մտահղացման կատա-
րելութեան ցուցանիշներն են: Միայն «չարամիտք» այս շնն ուզում խոստովա-
նել, անտեսում են այս ու մերժում աստծո գոյութիւնը:

Հանդես գալով աստծո՝ որպես ստեղծագործող էութեան, որպես աշխարհը
սկզբնավորողի և նրա օրինաչափութիւնները սահմանողի գաղափարի պաշտ-
պանութեամբ, կամբրոնացին միաժամանակ այն միտքն է արտահայտում, թե
մենք չգիտենք ի՞նչ է աստված, ինչպե՞ս է նա ստեղծագործել, ինչպե՞ս է նա-
խախնամում արարվածներին և այլն: Դիմելով համադրութեան, նա գրում է՝

¹⁶ Նույն տեղում, էջ 224ա:

¹⁷ Նույն տեղում, էջ 224բ:

¹⁸ Նույն տեղում, էջ 279բ:

ինչպես գիտենալով որ հողմը կա, բայց չգիտենք ի՞նչ է այն, որտեղի՞ց է գալիս, ո՞ր է գնում, ի՞նչ գույն ու որակ ունի, ապսպէս և աստուած, գիտեմք ղնա, ղի է, ղի զմեզ նախախնամ է և արարածոցս կառավարէ, բայց թէ որպէ՞ս է ինքն, կամ որպէ՞ս զսոսա վարէ՝ անհաս է ի մէնջ և յանճառութեան թեւ հողմոց բարձրացեալ՝ հասողութիւն գիտութեան նորա»¹⁹։ Միջնադարում այսպիսի ըմբռնման կարելի է հանդիպել ոչ միայն Լամբրոնացու մոտ։ Չնայած աստվածաբանութեան անհարիր լինելուն, այն չի դիտվել որպես ուղիղ հավատից շեղում։

Ստեղծագործված բնությունը, ներառյալ նաև մարդը, չորս տարրերի միացությունն են, պնդում է Լամբրոնացին, հետևելով բնության բաղադրություն մասին միջնադարյան Հայաստանում անբաժան կերպով իշխող տեսակետին։ Տարրերը հավերժական են, նրանք ստեղծված են, բայց անշնչանալի։ Նրանց միավորումից առաջացած առանձին գոյացումները՝ եզակի իրերն ու առարկաները վերջավոր են, ժամանակավոր ու անցողիկ, մինչդեռ տարրերն անվերջ են ու հավիտենական։ Չորս տարրերը «ոչ պակաս են և ոչ ունայնանան, որպէս մարդկան մարմինք, որ ի նոցանէ ունին զնիւթ գոյացութեանն»²⁰։ Տարրերը՝ «երկիր և հուր, և հողմ, և ջուր» թանձր նյութ են՝ «ոչ են անմարմինք»։ Աստված նրանցից յուրաքանչյուրին տվել է որոշակի բնություն և նախախտ կառուցություն։ Ի հակադրություն առանձին իրերի, օրինակ, մարդու, որը կարող է ոչնչանալ՝ «ի կենդանութենէ, ի շարժողութենէ և ի րանաւորութենէ ապականութեան և ոչ էութեան» մատնվել, տարրերը հավիտենական են։ Այս առումով նրանք ավելի կատարյալ են, քան մարդը, «թեև զգաութեամբ և բանաւորութեամբ գերազանց ենք, քան զնոսա»²¹։

Նյութի հավերժականության մասին միտքը Լամբրոնացու մոտ շատ որոշակիորեն է դրսևորվում։ Ժիշտ է, կրոնական թաղանթում, բայց և այնպես նա արտահայտել է հետևյալ առողջ տեսակետը. «Ծաւէտ է աստուած, յաւիտեան՝ հրեշտակք, յաւիտեան և երկրքս ի ներկայս և լուսաւորք, իսկ մարդ և այլ կենդանիք ապականացուք և անցաւորք... Իսկ թէ յաւիտեան զնիւթքս մի գաւրմանար, զի յաւիտեան՝ որչափ այս աշխարհս է»²²։

Լամբրոնացու տարրաբանական ըմբռնումների մեջ առկա է նաև տարրերի հակասական հատկանիշներ ունենալու մասին միտքը։ «Թշնամիք, անհաշտելիք են տարրերքս չորս ժայրին՝ շորութեամբն և խոնաւութեամբն, ջերմութեամբն և ցրտութեամբն»²³, — գրում է նա։ Ընդ որում, «իւրաքանչիւր ոք երկու ժայր ունի», հողն ունի «ցրտութիւն և շորութիւն», ջուրը՝ «խոնաւութիւն և ցրտութիւն», հուրը՝ «ջերմութիւն և շորութիւն», օդը՝ «ջերմութիւն և խոնաւութիւն»։ Տարրերի նման հատկանիշները նրանց միացման, իսկ տարրեր հատկանիշները՝ բաժանման հիմք են։ Յուրաքանչյուր առարկա հակասական հատկանիշներ ունեցող տարրերի միասնություն է։

Նյութերի բացակայության պատճառով Լամբրոնացու տարրաբանական ըմբռնումների մասին ավելին ասել հնարավոր չէ։ Ավելի հանգամանորեն կարելի է ներկայացնել Լամբրոնացու հայացքները իմացութեան պրոբլեմի շուրջը։

¹⁹ Ձեռ. № 4694, էջ 443ա։

²⁰ Ձեռ. № 1142, էջ 203բ։

²¹ Նույն տեղում։

²² Նույն տեղում, էջ 219ա։

²³ Ձեռ. № 5650, էջ 361բ։

Ամենից առաջ պետք է ասել, որ մարդու ճանաչողական հնարավորությունների վերաբերյալ նրա դատողությունների մեջ թերահավատություն է նկատվում, Հատկապես տիեզերքի, ինչպես նաև բնության ու նրա մի շարք երևույթների մասին եղած գիտելիքները կամբրոնացին անբավարար է համարում և միաժամանակ տարակուսանք է հայտնում այդ բնագավառում մարդկային իմացության հետագա նվաճումների նկատմամբ: Նկատի ունենալով բնության մի շարք երևույթներ, նա գրում է, թե «Երբ ասես այս ամենայն անհաս մնա ի մարդկան գիտութենէ, քանզի ոչ կարեմք յերկինս ձգտել և իջանել, և զլուսաւորացն կարգ պատմել, ոչ հողմս ժողովել և գիտել, թէ ուստի շնչեն, և ոչ ջուրս ամփոփել և գիտել զորքանն, և ոչ ի ծագս երկրի կարող եմք ժամանել: Արդ, որովհետև այսոքիկ անհաս մնան ի մենջ, ե՞րբ կարեմք պարծել, թե իմաստուն եմք ըստ բնական գիտութեանս»²⁴:

Միջնադարյան հայ մտավորականը այն միտքն է հայտնում, թե գիտելիքների խնդրում (բացառությամբ աստվածաբանության) և հասարակական կյանքի բնագավառում մարդկությունն առաջընթաց չի ապրել: «Մի պարծեսցի ոք յանձն,— գրում է նա,— թէ քան ճոր խօսի կամ գործ ճոր կառարէ և ինքն յանձնէ ի վերա նորին պանծասցի, զի այն նախ քան զինքն յառաջնոցն լեալ է՝ և իմաստուն խօսքն, և վաելլական գործն: Բայց մի գտցի տեղի աստ հելլենացի փիլիսոփայից կարծիք, որք շրջան փոփոխման տան կարծիս ինքնեղութեան արարածոցս և յաւիտենականութեան... Եւ այսպէս ընթանան մարդիկ ընդ կեանս աշխարհիս միմեանց նմանութեամբ, և զոր առաջինքն գործեցին, վերջինքն ի նոյնն փութան՝ զհարկաւոր գործս և զանհարկս»²⁵:

Այսպիսով, կամբրոնացին այն կարծիքին է, թե իր ժամանակաշրջանում երևան եկող «խօսքը» և «գործը» նորություն չեն պարունակում, այսինքն՝ գիտելիքները (բացառությամբ աշխարհի արարչագործության մասին քրիստոնեական-աստվածաբանական ուսմունքի) հույն փիլիսոփաների տեսակետների կրկնությունն են, իսկ կյանքն ընթանում է հիմնականում ճիշտ այնպես, ինչպես «առաջինքն գործեցին»: Անշուշտ, միջնադարյան մտածողից չենք կարող պահանջել, որ նա հասկանար ու արձանագրեր սոցիալ-դասակարգային այն տարբերությունները, որոնք էականորեն զանազանում են միմյանցից երկու տարբեր դարաշրջանները՝ ստրկատիրականն ու ֆեոդալականը:

Մարդիկ, ըստ կամբրոնացու, կյանքի ընթացքում անհրաժեշտ նյութական միջոցների հայթայթման համար ձեռք են բերում որոշ աշխատանքային փորձ ու գիտելիքներ և դրանք հաղորդում են հաջորդ սերնդին, նրանց՝ «որ զկնի մեր գան»: Մրանք, օգտվելով նախորդ սերնդի փորձից, կատարում են հիմնականում նույն գործողությունները: Դրանք, ըստ կամբրոնացու, սերնդն սերունդ չեն փոխվում: «Զի լինի ի մենջ այն գործն, զոր առաջինքն արարին և զոր մեք առնեմք, որ զկնի մեր գան՝ զնոյնն վերստին գործեն: Եւ նոր գործ չկատարի ի մարդկանէ, որ ընդ արեգակամբս բերիմք, այլ զոր ուսաք և տեսաք՝ գործեմք՝ շինել, տնկել, խօսել, գործել, վարել զաշխարհս և վաելել: Զայս զանազան գործքս մեք յառաջագոյն յաշորդեցաք և որք զկնի մեր գան ի մենջ առնուն և ուսանին»²⁶, Այս դատողությունից հետևում է, որ կամբրոնացին մարդկության

24 Ձեռ. № 1142, էջ 148ա:

25 Նույն տեղում, էջ 204ա:

26 Նույն տեղում:

կյանքի ողջ պատմությունը ընկալում է որպէս հիմնական գործողությունների կրկնողություն՝ նույն հիմքի վրա: Անշուշտ, ճիշտ է նա, որ քաղաքակրթության պատմության ընթացքում մարդկանց գործողությունների բովանդակությունը հիմնականում չի փոխվում, դրանք ուղղված են կենսամիջոցներ հայթայթելուն և մարդիկ միշտ գործել են իրենց հոգևոր ու նյութական կարիքները բավարարելու համար: Բայց նա սխալվում է, երբ չի տեսնում, որ դարերի ընթացքում փոխվում են նյութական ու հոգևոր կարիքները հոգալու ձևերն ու եղանակները և դրանց հիման վրա՝ նաև մարդկանց հարաբերությունների ձևերն ու եղանակները:

Անդրադառնալով ճանաչողության ձևերի ու մեթոդների վերաբերյալ Լամբրոնացու հայացքներին, նախ պետք է ասել, որ նա մեծ նշանակություն էր տալիս իմացության զգայական աստիճանին, առանց որի առհասարակ անհրաժեշտ է որևէ գիտելիքը: Զգայական ճանաչողությունը սկիզբ ու ակունքն է ամեն մի գիտելիքի, «զոր օրինակ,— գրում է նա,— ի ծնէ կոյր յորժամ լսէ ի մենջ, թէ է արեգակն և աստեղք՝ հաւատա և խօսի զնոցանէ, բայց թեև բազում անգամ արկանէ ի գործ զիմացականն, զէութիւն նոցա, որակութիւն ոչ կարէ սահմանել, այնու զի մարմնով ոչ է տեսնալ»²⁷: Լամբրոնացին սրանով միաժամանակ ցանկացել է ասել, որ մարդու գիտելիքները որևէ երևույթի կամ առարկայի մասին չեն կարող ստույգ լինել, եթե նա մոտիկից չի շոշափել ու չի ընկալել առարկան: Վերոհիշյալ օրինակը նա բերում է նաև այն միտքն ապացուցելու համար, թե մենք չգիտենք ու չենք կարող իմանալ աստծո և հրեշտակների մասին, քանի որ դրանց մասին խոսելիս նման ենք կույրի, որովհետև երբևէ չենք տեսել դրանց:

Սակայն, չնայած այս հանգամանքին, Լամբրոնացու իմացաբանությունը ավելի շատ ռացիոնալիստական երանգ ունի, քան սենսուալիստական: «Իմաստութիւն,— գրում է նա,— ստուգաբանի իմացումն կամ անցելոց իրացն կամ առաջիկայիցն՝ յորս կարէ հասանել տեսողական մտացս հանճար և ոչ զգայարանս, քանզի զգայարանքս միայն զհպելսն յինքն քննէ, իսկ իմացումն մտաց ելանէ յերկինս, ընթանայ ի ծագս աշխարհի, յիշէ զանցեալն, տեսանէ զառաջիկայ պատահումն»²⁸: Բացի այս, զգայական ընկալումը, որը կապված է մարմնի հետ, ինքնին պասսիվ է: Ակտիվը բանական միտքն է, որը և պայմանավորում ու ուղղություն է տալիս զգայություններին: Խոսելով մտքի և զգայությունների, հոգու ու մարմնի հարաբերության մասին, նա գրում է. «Կին կոչէ դարձեալ բանական մտացն զմարմինն և զգայարանսն, զի որպէս տկար է կինն, քան զայրն և ի նմանէ բեղմնաւորի և պտղաբերէ, այսպէս մարմինս տկար է, քան զմիտսն և ի նորա սերմանցն և յազդմանցն բեղմնաւորին զգայարանքս և պտղաբերեն, լեզու՝ զխօսս, աչք՝ զտեսութիւն, ունկն՝ զլսելութիւն, ձեռքն՝ զշօշափումն և այլն: Եւ անկար է սոցա ներգործելոյ առանց մտացն ազդելոյ»²⁹: Մի այլ տեղ նա գրում է. «Իմաստութեանս անուն ի զանազան տեսակս բացատրի, սակայն բնօքն ներգործութիւն է իմացող մտացն և ոչ զգայարանացն: Արդ, իմաստութիւն էր հելլենացոցն, որով ձգտեցան ի լուսաւորացող շաւղս, յերկրաին նիւթաց որոշմունք, ի բնութեանս տեղեկութիւն՝ յորս նե-

27 Ձեռ. № 4694, էջ 94բ:

28 Նույն տեղում, էջ 240բ—241ա:

29 Նույն տեղում, էջ 566բ:

րակրթութեամբ ստացան բազում իրաց կանխագիտութիւն: Իմաստութիւն է և զանազան արհեստից գիւտք, զի իմացող միտքն շարժէ զսգաարանս՝ առ իւրաքանչիւրոց կատարումն: Իմաստութիւն է և բանից ընտրութիւնք և բացատրութիւն ստուգութեանն ի ստութենէն, և առ ի նոյնն ճարտարութիւն՝ ի խոհական մտացն յառաջ եկեալ»³⁰:

Մեկնաբանելով Հին կտակարանի գրքերից մեկի Գ. գլխի այն միտքը, թե «նմենեցուն ժամանակ է, և ժամ ամենայն իրաց ի ներքոյ երկնից. ժամանակ ծնանելոյ և ժամանակ մեռանելոյ, ժամանակ տնկելոյ և ժամանակ խելոյ անկեալն...», Լամբրոնացին եզրակացնում է. «Եւ այսպէս տիրէ ժամանակն պատկերանացն և ոչ թէ պատկերանն՝ ժամանակին: Եւ ոչ կարէ օրէնք զմարգն միշտ իւրն ծառա պահել, այլ ինքն ծառաէ ընտրողութեան ժամանակին»³¹: Այս եզրակացութիւնը հակասում է կրոնական գոգմատիկային և նշանակում, որ չպետք է կուրորեն հետևել սկզբունքներին՝ «պատկերանացն». դրանք դուրս չեն ժամանակից, մշտական ու հավիտենական ճշմարտութիւններ չեն: Դրանցից պետք է ընտրել այն, ինչ թելադրում է ժամանակը, այլ կերպ ասած՝ պատմական հանգամանքները, կյանքն ու պայմանները:

Զարգացնելով իր թեզը, Լամբրոնացին հարց է տալիս՝ ո՞րն է լավը՝ պատերա՞զմը, թե՞ խաղաղութիւնը և պատասխանում է. անշուշտ՝ խաղաղութիւնը: Բայց, արդո՞ք, միշտ, բոլոր պարագաներում պետք է խաղաղության ձգտել և խաղաղութիւն քարոզել: Ո՛չ, պատասխանում է Լամբրոնացին, թշնամու դեմ, երբ նա շար գործեր է նյութում, պետք է պատերազմել, «իսկ առ եղբարս կալ խաղաղութեան»: «Եւ տես,— շարունակում է նա,— զի օրենք խաղաղութեանն ոչ է հանապազ ողջունելի, այլ ժամանակի ընտրողութեամբ... Թէ հնար է՝ ընդ ամենայն մարդկան զխաղաղութիւն կալչիք, յորժամ ոչ եղև հնար՝ ընտրեաց զպատերազմելն»³²:

Լամբրոնացին նույն կերպ է մոտենում նաև բարոյական վատեգորիաներին: Ոչ մի հասկացութիւն և ըմբռնում, ըստ նրա, քարացած չէ: Ժամանակը, տեղն ու հանգամանքներն են որոշում նրանց ճշմարիտ կամ սխալ, լավ կամ վատ, առաքինի կամ անբարոյական, շար կամ բարի, տգեղ կամ գեղեցիկ և այլն լինելը: Երեւթներին թե՛ քաղաքական, թե՛ բարոյական գնահատականն ու բնութագիրը հարաբերական են: Տալբեր պարագաներում նրանք փոխում են իրենց տեղը, անցում է կատարվում մեկից մյուսը, շարը կարող է բարի դիտվել, անիրավը՝ իրավացի, անօրինականը՝ օրինական, տհաճը՝ հաճելի և այլն: Այսպես, օրինակ՝ «Օրենքն ասէ՝ մի ապանաներ, բայց պատշաճ ժամանակն զսպանանելն օրինացն լրումն էցույց և զոչ սպանանելն արհամարհութիւն»³³, կամ «Զաղքատն կերակրելով բժշկեա և հիւանդն գեղօք... առ այսպիսի բժշկութիւն խոնարհելովն՝ գովիս, ապա թէ զանարժանն բժշկեա՝ պարսաւիս»³⁴: Դարձյալ մի օրինակ՝ «Կարկուտն և ջուրն մի են բնութեամբ, բայց սա վնասէ զերկիր և նա սնուցանէ»: Այսպես է նաև խորհուրդը. այն կարող է լինել շար կամ բարի, թեև երկու դեպքում էլ խորհուրդ է³⁵:

30 Ձեռ. № 1142, էջ 4բ:

31 Նույն տեղում, էջ 218բ:

32 Նույն տեղում:

33 Նույն տեղում, էջ 217ա:

34 Նույն տեղում:

35 Ձեռ. № 4694, էջ 95բ:

Իսկապես իմեն նման օրինակները, որոնց մեջ նկատվում է կյանքը, հասարակական ու բնության երևույթները փոփոխման մեջ ընկալելու ու բացատրելու անկասելի տենդենց: Լամբրոնացին գտնում է, որ ինքնին, առանց նկատի առնելու ժամանակն ու պայմանները, բնութագրող հասկացությունները «անկատար են», այսինքն՝ դեռևս ճիշտ կամ սխալ լինել չեն կարող՝ «ոչ մեղքն մեղք է և ոչ արդարությունն՝ արդարություն», դրանք իմաստավորվում են կոնկրետ գործողության մեջ, որոշակի ժամանակի ու պայմանների մեջ. «Ջի որ արդարություն է խոստովանեալ՝ ի տարադէպ ժամու երբ գործի՝ մեղք է ծանրագոյն, և որ յանցանքն է խոստովանեալ՝ ի դէպ ժամու երբ գործի՝ արդարություն է»³⁶: Հետաքրքրական է Լամբրոնացու հետևյալ դատողությունը. «է ի մեջ մարդկան և անասնոց այսպիսի հասարակությունս, զի պատահման ի ներքոն են և պատահմամբ հանդիպի ի նոցա կենցաղոյս ընթացք՝ ոմն վիճակի յառողջութիւն և ոմն ի հիւանդութիւն, ոմն ի մեծութիւն և միւսն յաղքատութիւն: Մի անասնո պատահն զենումն և միւսոյն զնոյն պատահէ ուտել, զմի թռչունն ձեռասուն առնեն թագաւորք և պատեն, և զմիւն առաջի նորա թուլցանեն ըմբռնել: Եւ ոչ քէ բնութենէ այս սահման, այլ պատահմանն, զի ամենայն բնութիւն մարդո մի է և սգարանք նոյն, սակայն պատահումնք չարին և բարո ի վերա նոցա զանազանք և անթիւք: Նոյնպէս և ի վերա անասնոց՝ մի կաքաւուն պատահէ զերծանել ի բազաէն և զմիւսն ըմբռնէ, մի եղջերին պատահէ խոցոտել սլաքաւ և միւսոյն փախչել: Ոմանք յերկարին ի կեանս ի մարդկանէ և յանասնոց, և այլք՝ կարճին, և յայս ածէ զնոսա պատահումն և ոչ բնութիւնն: Արդ, այսպէս գան ի մահն պատահմամբ և ոչ կարգաւ և մարդիկ և անասունք, զի ձգէ պատահումն զոմանս ի կարճ ժամանակս և զոմանս յերկայնս»³⁷:

Այս դատողությունից հետևում է, որ հայ փիլիսոփայի չի մերժում պատահականությունը բնության մեջ և հասարակական կյանքում: Նա պատահականությունը սահմանում է որպես մի բան, որը չի բխում տվյալ իրի, առարկայի, երևույթի բնությունից, էությունից ու կարող է լինել կամ էլ չլինել:

Այսպիսով, Լամբրոնացու փիլիսոփայական հայացքների մեջ դրսևորվում են նրա մտքի խորությունն ու ուրույն մտածողությունը: Լամբրոնացու փիլիսոփայական հայացքների մեջ քիչ չեն հետաքրքրական, առողջ ու խոր իմաստ պարունակող դատողությունները: Դրանք բավարար հիմք կարող են ծառայել Լամբրոնացուն բարձր գնահատելու ու արժեքավորելու ոչ միայն որպես հասարակական-քաղաքական գործչի, այլև տեսաբանի և փիլիսոփայի:

ФИЛОСОФСКИЕ ВЗГЛЯДЫ НЕРСЕСА ЛАМБРОНАЦИ

Г. О. ГРИГОРЯН

Р е з ю м е

Видный армянский общественный деятель и мыслитель Нерсес Ламбронаци (1153—1198) выступал преимущественно как публицист. Однако в его трудах имеются рассуждения и философско-теоретического характера.

³⁶ Ձեռ. № 1142, էջ 218բ:

³⁷ Ձեռ. № 4694, էջ 223ա:

Ламбронати отвергал мысль о предопределенности воли человека и исторических явлений и с этих позиций рассматривал общественно-политические проблемы. Не выступая против монархического строя, он отрицательно относился к абсолютизму и призывал ограничить действия властителей рамками закона. Констатируя факт социального неравенства, Ламбронати признавал, что причиной этого является различие в имущественном положении людей.

Субстанциональным началом мира для Ламбронати является бог. Он придерживался космологического доказательства бытия бога.

В теории познания Ламбронати наблюдаются моменты скептицизма. Ламбронати с некоторым недоверием высказывается о человеческих возможностях проникновения в тайны предметов и явлений природы и вселенной в целом.